

von Wulf Wager

I han gnuag vom Fußball



Kennat Sie des obeschreiblich tolle Gefühl, obends oifach so ens Bett zom falla, sofort eizomschlofa, ond noch neun Stond total erfrischt ufzomwacha?

I au net.

Des liegt vornehmlich an derra Fuaßball -WM. Mei Nachbere – Sia wissat jo, des propere 150-Kilo-Prachtsweib – hot nämlich ihren Garte zur

Public-Viewing-Area erklärt. Seit Beginn von derra segghafta Fuaßball-WM en Brasilia guckt dui mit ihrer gesamta buckliga Vrwandschaft en ihrem Garta, der grad mol fem Meter Luftlinie von meim Schlofzammer entfernt ischt, alle Spiele a. Au dia Spiele, die erscht om Mitternacht agfanga hend. Des geng jo no.

Aber dui hot en geischtig zemlich minderbemittelda Schwiegersonn, der a Lache hot, wia wennr en Igel gfressa ond mit Sagrotan nochgurgelt hätt. Wo dr Herrgott d' Intelligenz vrdoilt hot, war der scheint's grad uf em Klo. Dem seine intelligenzfreie Kommentare, gepaart mit derra wafascheipflichtiga überlauta Lache, lassat mi seit Wochanemme gscheit schlofa. No hemmr neulich a bissle Hausmusik gmacht. Om femf noch Zehne isch der Seggl komma, hot an dr Haustür gschellt ond gsait, es sei jetzt fem noch Zehne. I han no zunem gsait, dass ich scho selber d' Uhr lesa kennt. Mir solle jetzt aufhaira, weil er schlofa mi-ass!

Kennat Se des Gefühl, wenn ganz langsam von onna ruf so a Wuat asteigt en alle Glieder ond en da Kopf, dass mr so a krommbogas A...loch am liabschta en Grondserzboda schlagä dät? I han's vorher au et kennt.

Bis näggschd Woch'

Euer

Wulf Wager

A handwritten signature in black ink, appearing to read 'Wager', with a long, sweeping underline that extends to the right.

Alle Kolumna zom nochlesa ondr: www.woascht.de
oder em Facebook em WulfWager Fanclub.